


清詩人徵略


三十八




內閣文庫			
函	冊	號	類
三	一	三	漢
二	六	八	書
架	冊	五	

內閣文庫			
函	冊	號	類
三	一	三	漢
二	六	八	書
架	冊	五	

內閣文庫	
番號	漢 3875
冊數	16 (11)
函號	290 36





國朝詩人徵略卷三十五

番禺張維屏子樹輯

紀昀

字曉嵐一字春帆號石雲直隸獻縣人乾隆十九年進士官至協辦大學士諡文達有紀文達公集公貫徹儒籍旁通百家

宗純皇帝命輯四庫全書公總其成凡六經傳注之得失諸史記載之異同子集之支分派別罔不抉奧提綱溯源徹委所撰定總目提要多至萬餘種攷古必衷諸是持論務得其平

學經室集

世爲河間著姓祖天申有善行父容舒官姚安太守河間爲九河故道天雨則窪中汪成巨浸夜有火光天申夜夢火光入樓中而公生火光遂隱人以爲公乃靈物托生也少而奇穎讀書過目不忘夜坐暗室二目如電光不燭而能見物比知識漸開光卽斂矣年二十四乾隆丁卯科解元甲戌成進士授庶吉士散館授編修己卯充山西鄉試正考官壬午提督福建學政戊子授貴州都勻知府晉侍讀學士緣事呈誤發烏魯木齊効力辛卯召還授編修二十八年擢侍讀

命爲四庫全書館總纂官丙申授侍讀學士充

文淵閣直閣事日講起居注官己亥擢詹事旋晉內閣學士壬寅授兵部右侍郎仍兼直閣事改任不開缺乃異數也甲辰充會試副考官壬子畿輔水災奏請截畱南漕萬石設十廠賑饑全活無算嘉慶元年丙辰充會試正考官轉兵部尙書癸亥六月以八旬開秩

上遣官賚

上方珍玩賜之是年奏婦女猝遭強暴捆縛受污不屈見戕者例無旌表臣謂捍刃捐生其志與抗節被殺

者無異如忠臣烈士誓不從賊而縶縛把持雖使
跪拜可謂之屈膝賊廷哉請

敕交大學士九卿科道公議與未被汚者略示區別量予
旌表大學士等議奏如兇手在兩人以上顯係孱
弱難支與強姦被殺者一體予旌飭交各督撫勘
明情形請

旨定奪

報可乙丑正月奉

旨調禮部尚書協辦大學士加太子少保管國子監事十
五日卒於位年八十有二

賜祭葬

子諡文達公於書無所不通尤深漢易力闢圖書之謬

四庫全書提要簡明目録皆出公手大而經史子集
以及醫卜詞曲之類其評論抉奧闡幽詞明理正
識力在王仲寶阮孝緒之上可謂通儒矣胸懷坦
率性好滑稽有陳亞之稱然驟聞其語近於詼諧
過而思之乃名言也

國朝漢
學師承記

或言紀文達公博覽淹貫何以不著書余曰文達

一生精力具見於

四庫全書提要又何必更著書今人目中所見書不

多故偶有一知半解便自矜爲創獲不知其說或爲古人所已言或爲昔人所已駭其不爲牀上之牀屋下之屋者蓋亦鮮矣文達之不輕著書正以自逾萬卷胸有千秋故也或又言文達不著書何以喜撰小說余曰此文達之深心也蓋考據辨論諸書至於今已大備且其書非畱心學問者多不寓目而稗官小說搜神誌怪談狐說鬼之書則無人不樂觀之故文達卽於此寓勸戒之方含箴規之意託之於小說而其書易行出之以諧談而其言易入然則閱微草堂筆記數種其覺夢之清鐘

迷津之寶筏乎觀者慎無以小說忽之

聽松廬文鈔

姜西溟不食豕紀曉嵐不食鴨自言雖良庖爲之亦覺腥穢不下咽且賦詩云靈均滋芳草乃不及梅樹海棠傾國姿杜陵不一賦以梅花海棠爲比鴨又何其幸也嗟乎嗜好愛憎之間有難強豈惟口味哉詩文亦然

聽松廬詩話

標題

題福建將軍平海圖

七古

十一月初一日

渡黃河

七古

建陽城外謝疊山賣卜處

七古

建溪二十四韻效昌黎體

五古

摘句

讀書如遊山觸目皆可悅

國朝詩人後集卷三十五
置身豈不高時有蹉跌慮

貴賤皆有營百歲誰得閒但使妄念淨即

為善閉關

昔未屬我前閱主已無數過此落誰手應

亦聽所遇且隨現在緣領此當前趣

當年爭洛蜀此外付金遼白溝河

人懷見明月侍坐得春風

全收月窟歸封內原有星弧在掌中西域人朝

窮荒更遣蟠桃使降表連收貝葉文

宿衛舊聞唐頡利衣冠今賜漢呼韓

由來六職分司馬況值諸戎貢旅獒

杜詩韓筆都堪愛王後盧前恐未安甲辰會闈

壽如君爽祥符驗學比甘盤道脈尊壽蔡葛山

蜀道正需貔虎將此中可有郭汾陽武會試

古來名將惟郭汾陽以武舉出身

應知今日持衡手原是當年下第人壬戌會闈

此日歐梅欣共事向來韓范本無爭

曲江春宴花無數遼海秋風淚幾行多少

遺珠收不盡中宵輾轉漏聲長

千古文章雖有價一時衡鑒豈無差

名士爲官原灑落詞人垂老半飢寒

車徒小駐三义路童稚爭看一品衣

時日暮微

王維早貴襄陽老俱是開元第一流

朱筠

字美叔號竹君順天大興人乾隆十九年進士官

侍講學士左遷編修有笥河文集

先生初爲諸城劉文正公所知及督安徽學政會

詔求遺書先生奏言翰林院貯有永樂大典內多有古書

世未見者請開局使尋閱且言搜輯之道甚備時

文正在軍機處顧不喜謂非政之要欲議寢之而

金壇于文襄公獨善先生奏與文正固爭執卒用

先生說上之

四庫全書館自是啟矣先生入京師居館中纂修日

下舊聞未幾文正卒文襄總裁館事先生顧不造

謁又時以持館中事與意迕文襄大憾一日見

上語及先生

上遽稱許朱筠學問文章殊過人文襄默不得發先生以

是獲安其督福建學政逾年

上使其弟珪代之歸數月遂卒先生爲人內友於兄弟而

外好交遊稱述人善惟恐不至後進之士多因以
得名尤喜小學勸人爲學先識字語意諄勤去而
人愛思之惜抱軒文集

上命開四庫全書館凡十餘年而書成於是人文炳曜遠
邁唐宋而其始實自君發之春融堂集

四庫全書得于永樂大典者凡五百餘部皆世所
不傳之本先生一言而此五百餘部之書其精神

心力得以復見於世嗚呼可謂盛業矣然非遭逢

聖主稽古右文儒臣亦曷由有此盛業哉聽松廬文鈔

標題 平定準噶爾恭紀四言百韻

摘句 帆如不動暮天沒岫竟欲斜秋水流

王鳴盛

字鳳喈號禮堂江南嘉定人乾隆十九年

賜進士第二人官光祿寺卿有耕養齋集

乾隆十二年鄉試以五經中式時沈侍郎德潛門

下吳泰來趙文哲張熙純錢大昕皆以博學工詩

文稱而咸推鳴盛爲渠帥十九年以第二人及第

二十一年大考翰林鳴盛名第一擢侍讀學士三

十四年充福建正考官尋陞內閣學士兼禮部侍

郎還京以濫用驛馬被吏議左遷光祿寺卿丁內

艱歸遂不復出鍵戶讀書垂三十年春融堂集

所撰尚書後案以鄭馬為主又撰十七史商榷一

百卷主於校勘本文補正譌脫最詳於輿地職官

典章制度又撰蛾術編一百卷其目有十說錄說

字說地說制說人說物說集說刻說通說系晚自

號西泚卒年七十有八光祿嘗日子門下士以金

子璞園為第一璞園名曰追嘉定諸生著有儀禮

正譌十七卷國朝漢學師承記

詩綜三唐既而旁涉宋人歸田後復守前說湖海詩傳

標題 矯志篇四言 東崦西崦五古 雨泊江岬登

天門絕頂七古

摘句 時於白雲裏流水松花香

疎鐘烟外寺遠火渡頭船

曉漲雲浮岬春山翠壓城

殘歲辭家隨斷雁大江積雪上孤舟

三戶遺墟春草碧六朝舊事暮江平

醉裏人將春並去望中雲與水相齊

蘆中問渡真窮士漢上題襟少故人

長江九派東流去何事孤舟獨向西

錢大昕

字曉徵號辛楣一號竹汀江南嘉定人乾隆十九年進士官少詹事有潛研堂集

君幼有神童之目乾隆十六年

高宗純皇帝南巡君獻賦

召試

賜舉人以內閣中書用入京與同年褚摺升吳荀叔講九

章算術又以

御製數理精蘊兼綜中西法之妙悉心探賈由是用以觀史則自太初三統四分中至大衍下迄授時盡得其測算之法尤嗜金石文字最熟於歷代官制損

益地里沿革所著經史答問廿二史攷異通鑑注辨正元詩紀事補元史氏族表補元史藝文志三統術衍四史朔閏攷金石文跋尾養新錄諸書君入中書後十九年成進士改庶吉士散館授編修二十三年大考二等一名擢贊善尋遷侍讀二十八年大考一等三名擢侍講學士三十七年擢少詹事君以知足爲懷謂官至四品可休故奉諱歸里不復出歷主鍾山婁東紫陽二書院而在紫陽至十六年之久門下士積二千餘人嘉慶九年十月二十日卒於書院年七十有七卒之日尙與諸

生口講指畫少疲倚枕而臥家人趨視則已與造化者遊矣春融堂集

戴編修震嘗謂人曰當代學者吾以曉徵為第二人蓋東原毅然以第一人自居然東原之學以肄經為宗不讀漢以後書若先生學究天人博綜羣

籍蔚然一代儒宗也國朝漢學師承記

十駕齋養新錄為嘉定錢氏晚年之書包羅廣大其義類似有可引伸者一條謂筮用錢始於齊隋唐初謹按朱子語類卜卦之錢始於京房又按胡一桂筮法變說引項平甫云以京房易考之世所

傳火珠林即其遺法火珠林即交單重拆也則錢卜實自漢始矣一條謂魏孫叔然始為翻語謹按惠氏九經古義云不來為狸并夾為籥勃鞞為披後世反切之學本於此又按顧氏音學云爾雅禘大祭也大祭正切禘字他如不律切筆鶻鶻切鳩蔽膝切鞞則翻切由來久矣一條謂四聲始於齊梁謹按三百篇涇以渭濁鐘鼓既設充耳琇實皆具四聲又隋書經籍志晉有張諒撰四聲韻林則四聲不自齊梁始矣一條論魁星謂奎非文章之府謹按孝經援神契奎主文昌倉頡效象宋均注

奎星屈曲相鉤似文字之畫然則日知錄謂奎文章之府未可議也至其論之創者謂鄭讀易簡之易與變易不易初無兩音又謂鄭注三禮並無麒麟皮冒鼓之說皆信而有徵豈獨可傳鄭即錢氏以碩學雄視海內其書滿家竊意其博而能一通而近正則是書之可貴固不徒以典核也修本堂稿
或問顧氏日知錄錢氏養新錄二書孰優余曰研究經史攷核典章博洽淹通誠難軒輊若汲汲焉以明體達用為學勤勤焉以扶世翼教為心有裨於治道有助於經世則日知錄一書未嘗非攷據

而不敢徒以攷據目之松心日錄

詠荆軻者多矣余最愛錢竹汀先生作詩云七首

懷中出諸郎殿下看燕丹心未死趙政膽先寒成

敗論人易從容舍命難千秋猶灑淚易水共沈瀾

聽松廬詩話

田家雜詩五首五古 中河五古 石鼓七古

琉璃廠窰戶掘土得古墓棺朽而骨殊異

其誌石題云大遼故銀青崇祿大夫上柱

國隴西李公督厥郎中改埋于故兆東二

十步因撫誌文大略作詩遺攷古者七古

讀漢書六首古五 齋中無事興到輒書數

字八首古五 生朝偶作古五 禹廟二十四

韻五言排律 平定準噶爾告捷禮成恭紀一

百韻五言排律 回部蕩平大功告成恭紀一

百韻七言排律

摘句 秋色江上來吳楚千里碧

雅頌風同源未可薄雕蟲

著錄晁公武評詩教器之

安心真是藥省事便成仙

江近山容潤冬來樹意寒

影形神互荅生老病相尋

四門唐博士萬戶漢通侯門神

韓子文皆從道出溫公事可對人言

闌外建旄麾鐵騎軍門推轂賜黃封金川平定

鳥道千盤朝縹馬龍韜三略夜封章

分茅列爵周三等舞羽敷文舜兩階

却從鮮甲橐弓日為念披堅執銳身感激

一時齊額手臨觴猶軫結纓人凱宴諸將士

盡識軒轅通道遠方知光武閉關非

浪傳阿母來青鳥却喜奇童對白麀茂陵

黃蓋竟因孤注勝青壇想見萬靈趨汴中詠古

直欲許身追稷契何曾譚蓺薄盧王杜文貞祠

百寶流蘇隨處挂不應全是為令狐李詩

老子詎矜兵甲富秀才曾耐粥糲貧范文正祠

文章巨手唐燕許山水前盟漢向禽歸愚先生

新詩想得江山助名士仍兼政事傳贈李南澗

彈指淒涼成浩劫招魂慘澹隔重關空餘

老友懸河淚灑到天西木果山哭趙損之

兒女穿鍼翻舊樣詞人乞巧換新詩閏七夕

三楚颿檣風上下萬家煙火水東西武昌

谿水一灣分向背山雲片刻改陰晴

曉山出霧皆成浪晚樹和煙半作雲

將相時來須重望功名論定要全終

美政久書江表傳詞人例作嶺南詩

文本性成兼有學句從苦得却能和

著書已勝金樓子汲古常攜玉帶生

歐陽集古一千卷洛社閒居二十年

偶借呼盧袁彥道居然完壁蘭相如

從古文章無定論由來場屋困名流

青紫那如名士貴漆膠獨與素心投

國朝詩人徵略卷三十五

國朝詩人徵略卷三十六

王昶

番禺張維屏子樹輯

字德甫號述庵江南嘉定人乾隆十九年進士官

刑部侍郎有春融堂集

公體貌修偉弱冠為名諸生乾隆癸酉舉于鄉甲

戌成進士歸選班二十二年

高宗純皇帝南巡召試一等第一

賜內閣中書協辦侍讀直軍機房洊陞刑部主事員外郎

郎中三十三年以言兩淮鹽運提引事不密罷職

時緬甸未靖阿文成公以定邊右副將軍總督雲
貴請公佐軍事遂至騰越出銅壁關擊賊江中勝
之緬酋乞降阿公屬公草檄允其降班師旋永昌
緬甸貢表久未至復從阿公如騰越三十六年溫
公福代阿公移師四川辦金川事奉

旨授吏部主事從溫公西路軍進討溫公屬公作檄斥僧
克桑罪遂克斑爛山進攻日耳寨阿公奉

詔由北路進兵兼督南路公復從阿公軍攻克美美卡以
皮船渡水克小金川僧克桑遁澤旺降進討大金
川阿公奏公無兄弟母年七十餘明大義勗以殫

心軍事今從軍五年矣得

旨陞員外郎三十八年至當噶山山脊絕險官兵營壘與
賊錯處且雨雪甚夏溫公兵潰木果木阿公亦退
兵至翁古爾壘時警報絡繹

詔旨疊至公力疾叱馬懸厓日行數百里夜治章奏文書
于礮火矢石之中無誤無畏冬大兵復進據美美
卡攻大板昭小金川平補員外郎擢郎中復從討
大金川克勒烏圍刮耳噠四十一年三路兵合攻
益急索諾木等率眾投罪公草露布告捷于是兩
金川悉平公在軍中前後九年每有所攻克輒議

敘凡加軍功十三級紀錄八次凱旋之日以戎服
行禮

賜宴奉

旨陞鴻臚寺卿賞戴花翎在軍機處行走四十二年擢大
理寺卿四十四年授都察院左副都御史四十五
年授江西按察使五十一年授雲南布政使五十
四年擢刑部右侍郎五十八年乞歸修墓冬還京
以病乞休

上鑒其老允之

諭以歲暮寒俟春融歸明年歸名其堂曰春融堂嘉慶四

年分賻滇銅鬻田宅以入官居于廟廡朋舊贈遺
盡以刻書五年重游泮宮十一年六月初七日卒
年八十有三順天鄉試會試公五爲同考官壬子
主順天鄉試士之出門下爲小門生及從游受業
者二千餘人公提倡風雅士藉品藻以成名致通
顯者甚衆生平重倫紀尚名節在軍營和平簡易
自科爾沁王以下皆親重之公所著春融堂詩文
集金石萃編湖海詩傳青浦詩傳琴畫樓詞續詞
綜等書皆刊成餘若天下書院志征緬紀聞屬車
雜誌朝聞錄等書四十餘種尙待次第校刊

研經室集

蘭泉先生有經術而通知時事爲儒臣而久歷戎
行博雅克擅夫詞章著述皆關於文獻而又愛才
若渴說士彌甘宜乎海內俊彥翕然稱之聽松廬
文鈔
蘭泉先生論文云稍濃則近塗澤稍奧則近贗古
此道中甘苦之言學爲古文者宜知之松軒
隨筆
述庵司寇北至興安南逾蠻幕句云昔依北斗今
南斗又從征金川句云我今更度大峩西已踰江
源一千里壯哉蓋古名將所歷罕及此者聽松廬
詩話
虞夏時黃河循太行自北而東至洛水分九河以
殺其勢復爲逆河歸于海其餘衍沃皆資種食魏

晉六朝以至遼金皆精水利未有運南方粟米供
給北方者自明開會通河運濟而北方水利久廢
昔日九河今變爲三十六淀七十二沽千里內外
沮洳淤澱海門又復狹隘不能迅速歸墟是以往
昔膏腴悉歸蕪沒此述庵先生詩自註也論黃河
今昔利病頗爲簡括松心
日錄
標題 古風贈沈學子古五 觀伏波銅鼓聯句一

百二十韻古五 詐馬古七 榜什古七 相撲

古七 教駢古七 折卜尊丹巴瑚土克圖再

世來朝詩以紀之古七 觀覺生寺大鐘聯

句一百八韻古五

樂戶行古七

雷回灘古五

粟子冲曉行二首古五

經高黎貢山古七

皮船古五

望日耳礪寨有作古七

克僧

格宗古七

美篤寺古五

賜宴紫光閣紀

恩詩一百六十韻古四

回部平定恭紀一

百韻古五言排律

副將軍振旅回永昌時屆歲

除追溯用兵顛末聯句八十韻古五言排律

摘句

小船如幽居夢醒聽柔艣湖天尙春陰層

雲被洲渚迴風掃垂楊殘滴下如雨溪橋

寂無人眷此孤禽語

一日過數灘灘灘獻奇警一灘亘數峰峰

峰露妍靚

野花鄖子國新月楚人船

寒烟生竹屋殘雪滿漁舟

一德追伊吕三分限魏吳諸葛忠武侯墓

鐘魚水寺傳山寺燈火吳船雜楚船京口

古埭煙波思召伯空山草木走符堅謝太傅祠

洵有才華開庾信誰知風義接靈均宋玉宅

千古傷心朋黨論一時破膽敵人知范文正祠

才子相門前代少詞臣羈迹異方多楊升庵宅

范家相

字左南號衡洲浙江會稽人乾隆十九年進士官
柳州知府有環淶軒詩草

三家詩拾遺范家相撰是編因王氏應麟之書重

加裒益而少變其體例近時惠棟九經古義余蕭

客古經解鈎沈於三家均有採掇論其賅備尙不

及是編也提要四庫

詩審范家相撰是書大旨斟酌於小序朱傳之閒

而斷以己意同上

摘句 何事人間最惆悵月明風細聽吹簫

王又曾

字受銘號穀原浙江秀水人乾隆十九年進士官
刑部主事有丁辛老屋集

穀原極為陳文勤公汪文端公稱許釋褐後皆以
為當得上第既入三甲人猶以秀水朱檢討為比

性善飲談笑風生神情瀟灑作詩專仿宋人信手

拈來自多生趣湖海詩傳

標題 迴谿草堂銷寒第六集古五 林良九鷺圖

古七

摘句 折入最深處高挂五百丈近遠無定姿變

幻非二象龍觀大

趁墟人裏飯畏虎客關門

秋生羣暑澹月出衆星低

畫橋脫板低新漲酒旆懸風澹舊題

橋外錫簫寒食路柳邊蠡殼酒船牕

翟灝

字晴江浙江仁和人乾隆十九年進士官教授有

無不宜齋集

先生博覽羣書精心考證著湖山便覽四書考異

爾雅補郭通俗編俱梓以行世碧碧話

晴江居杭城東北臨江鄉村民咸以蠶桑爲生不

知有習舉子業者自晴江讀書取科第于是其弟

涵心淵瀚元洲澍傳霖皆以能詩稱湖海詩傳

標題 湯婆子聯句五古 咏煙草三十六韻五言排律

摘句 桑畦遠隔人家小菜甲平連雉堞遙

岼口人家皆種柳船中客饌每供魚

沈業富

字方穀號既堂江南高郵人乾隆十九年進士官

河東鹽運使

君性情醇厚篤於友朋武進黃仲則過河東畱之

賓館病中哀其諸作抄錄成編俾無遺佚竹西自
午橋太史沒詩壇寥落君以詞林舊宿家居望重

香山洛社之風賴以不墜湖海詩傳

都轉守太平最久救荒恤災至今民思之種竹軒餘話

摘句 過客情懷逢竹院閒農風味是柴門

牛背遠浮新漲滿馬蹄平踏亂雲低

葉佩蓀

字丹穎浙江歸安人乾隆十九年進士官湖北布

政使有傳經堂集

丹穎覃心易理獨契微言著易守四十卷勃窣理

窟多前人所未逮湖海詩傳

摘句 行路此身賤謀生吾道艱

真從田父語莫作使君看

一線波盤江北去百重山壓漢東來

曹學閔

字孝如號慕堂山西汾陽人乾隆十九年進士官

宗人府府丞有紫雲山房詩鈔

公在臺垣八年所陳奏於民生吏治皆有裨益性

耽山水暇輒與三四知己出國門游賞如潭柘戒

壇祕魔厓香界寺往往流連信宿生平不臧否人

物而胸中界限分明嘗曰人各有所偏但當棄短

取長否則無一人可交矣潛研堂集

摘句 致身有具從行伍黥面無妨出將材狄武襄祠

何在田

字鶴年江西廣昌人乾隆二十一年舉人有玉耕

堂詩集

在田高簡厭馳騫寄南昌僧舍鉛山蔣士銓見其

詩壁間與訂交始知名江西詩徵

袁子才過南昌時蔣心餘病風口不能言以左手

書何鶴年詩數聯老輩之愛才如此聽松廬詩話

賤骨草葉如薺麥中有赤心人截取之得土即活

能治重傷凡跌損者以根漬酒服之立效攷古方

書皆未載惟見於何鶴年詩集中憶余兩年血痢

百藥不效服鴉膽子四十九粒一服而愈鴉膽子

本草未載因思有一病即有一藥天生百穀以養

人又生百草以救人天心仁愛於此可見松軒隨筆

標題 子陵先生釣臺古 南昌閔節婦五古

摘句 早歲貪著書動欲成簡冊消磨客氣盡積

寸未得尺

飽帆遇颶風收發豈由我

前賢失足處未敢輕唾罵
野徑無人問隨牛自得村
早霞隨日上敗葉擁潮行
荒程難計里野飯不成餐
樵室薪爲榻漁舟網作帆
移牀蟲見蛻徹饌蟻徵糧
藉懶成高志因貧得儉名
有客嫌庭窄無書覺晝長
枕酣新夢美酒罷故愁生
月借日光成半面雨收雲氣泛餘絲

豈有奇才堪許國無端隨衆強離家
容悴多因爲客早心閒還幸受恩稀
客少常畱不鳴雁睡酣翻喜失晨雞
寒星欲失見漁父小雨無聲添落花

國朝詩人徵略卷三十六

番禺張維屏子樹軒

國朝詩人徵略卷三十七

蔣士銓

字心餘號茗生江西鉛山人乾隆二十二年進士

官編修有忠雅堂集

君天稟英絕有覽輒記丁卯舉于鄉甲戌考授中

書丁丑成進士入翰林散館第一居官八年乞假

養母大府聘為蕺山崇文安定三書院山長會少

宰彭公元瑞召見

天子問蔣某何在彭以渠母老對及太宜人薨君感

上恩入都京察一等以御史用旋患風痺還南昌小倉山房文集

君秀眉長身兩眸子奕奕如電在蕺山時越中三

江間日久堙廢君力請于大府借帑辦治日事雖

非山長責然食越人粟則視越人如一家焉有駱

生者負鹽課客死君連夜作十三札飛遞嶺南俾

其孀孤扶六櫬歸同上

裘文達公在

上前薦君與彭公為江右兩名士以故

上賜彭公詩并及君同上

君晚年雖病廢而神明不衰左手作字橫斜入古

所居藏園水木明瑟五子七孫穿花繞膝死之夕

無雲而雷者三相傳君生時亦然同上

君風神散朗如魏晉間人從容讌笑繼以諧謔而

甄錄寒峻激揚忠義有古烈士之風博通淹雅自

古文辭及填詞度曲無所不工而最擅場者莫如

詩論詩於當代以君為首君與禮部尚書彭君元

瑞生同鄉成進士同年又同官翰林

上賜詩嘗有江右兩名士之目乾隆五十年二月二十二

日卒年六十有一春融堂集

茗生諸體皆工蒼蒼莽莽不主故常正如昆陽夜

戰雷雨交作又如洞庭君吹笛海立雲垂信足以
開拓萬古之心胸推倒一時之豪傑也君長身玉
立眉目朗然嶽嵒磊落肺腑槎枒遇忠孝節烈事
輒長歌以紀之夙知音律意所未盡放而爲院本
有芝龕香祖諸劇世尤稱之湖海詩傳
心餘先生詩篇篇本色語語根心不欲英雄欺人
不肯優孟摹古言情而出以蘊藉故無粗率之辭
用事而妙於剪裁故無堆垛之迹金銀銅鐵鎔爲
一鑪而不覺其雜酸鹹辛甘調於一鼎而愈覺其
和無他有我以主之有氣以運之故也聽松廬詩話

袁子才以第一人自命而以第二位置先生然通
觀兩集袁詩多可驚可喜而蔣詩則多可味同上

先生哀楊子載塵詩有云君死我尙生忍見顛危
糾悠悠成坐視何用我爲友真氣鬱勃於此見先
生性情肫摯不獨交誼之篤也同上

心餘詩楚水入吳寬五字中有數千里又棲霞詩
萬石聚成海句亦奇又焦山詩江隨禹力已朝宗
山到漢朝纔得姓拈出便警又閉門人各在深山
七字極有味至如古來失路萬人淚斷續滴作桑
乾河二語較之文章遼海哭秋風尤爲沈痛同上

行旅遇涉水之處深則須舟淺或推車或牽馬皆不能不需人助於是土人遂有藉端橫索者然猶曰水爲之也乃車轍所經往往有故設陷阱致令覆車以恣其需索之欲者此亦宰斯土者所宜留意也心餘先生詩云泥中列阱道旁嬉橫索金錢一挽持過客囊空民橐滿可憐官吏不會知同上先生詩云寄言學詩者唐宋皆吾師宗旨可見同上先生古文亦雅正有法其鋪敘詞尤爲獨絕或行以勁氣則磊落崎嶇或出以深情則纏綿婉曲直是世間一種不可磨滅文字不得以小技目之同上

標題

上灘

古五

萬年橋

古七

自鳴鐘

古五

到家六首

古五

上芻行

古七

臺灣賞番圖

覆車紀行

古五

京師樂府詞十六首

蔡貞女詩

古七

鐵篙行

古七

隆興寺

大菩薩歌

古七

讀史三首

古五

文字

四首

古五

辯詩

古五

天地球

古七

錢武肅

王鐵券歌

古七

題表忠觀碑後

古七

執紼

詞六章

古長短

雷門吟

古五

宛委山金簡

玉書歌

古七

自題黻珮偕老圖

古五

題文

信國遺像

古七

醉歌

古七

江孝子詩

古七

王文成驛丞署尾硯歌古七 白將軍雲上

歌古七 李竹溪桃源圖古七 再示知讓三

首古五 文信國琴古七

摘句 文字何以壽身後無虛名元氣結紙上留

此真性情讀書確有得落筆當孤行數語

立堅壁寸鐵排天兵

古人未易及不幸有可議恆情樂攻短羣

口謀然肆試存易地思幽獨但滋愧

君子互攻擊翻貽小人嗤

惡人亦好名常恐君子棄惟量貴容物奈

何觸其忌

俗士學干祿居恆厭枯槁貴來無可為翻

嗟入官早

萬物各處逸天地居其勞

生非不材木斧斤安得辭為用信偶然天

地難悉知輪轅與屏几勞逸誰使為

天地多境界所值偶得之

古來數大事據我方寸胸積疑孰與釋恆

理皆莫通古聖不可作謬誤難折中

讀書心久死每被酒力活

俗士竊章句驟貴亦自矜國家數大事何
以為肩承

地力養萬物至慈過于天

偶得心造語古人復我先

屈意頌庸人文辭母乃偽

破廟狐吹火孤墳鬼唱詩

水喧帆力健天濶听沙圓

雲氣為朝暮山容互淺深

民窮胥役富縣小士人尊

萬竹掩危磴一菴埋綠雲

飢寒未市千金骨貧賤終成一化身

不關天地非奇困能動風雷亦異才

馮福寺

離鄉味似新婚別乍客身經蜀道難

古來名士窮難送天下才人貴亦勞

東鄰熟睡西鄰醒各樣情懷各自知

飢驅氣藉詩書長游倦心惟骨肉親

杯空寒色一鐙裏夢在雨聲雙艣中

苦吟猶學李長吉薦士不逢韓退之

片雲當晝酒杯黑新綠過牆庭宇深

貧賤讀書聞見少艱難求仕鬢毛蒼

國朝詩人傳略卷三十一
攜來琴鶴存清節看到江山要好詩
家饒田宅爲身累士解悲歌是病根
食祿敢存能死念臨危纔見讀書身
性靈獨到刪常語比興兼存見國風
但借文章敵憂患莫看科第作功名
讀書心較求官急許國身容戀母閒
諸緣淡定根于達萬物生機得自和
高名身後誰千古同輩年來半九原
此生窮困由天授後日功名厭客談
瀑布之餘雲盡水茯苓其上樹交花

彭元瑞

字掌仍號雲楣江西南昌人乾隆二十二年進士
官至協辦大學士諡文勤有恩餘堂稿
文勤少年敏慧早直

西清應奉文字婉麗清新出人意表所進無不被蒙
獎賞者而恭跋

御製全韻詩乃集千字文爲之又撰

乾清宮前燈詞駢體尤佳

上賜以貂裘端硯中外榮之故

恩眷始終不替嘗輯宋人四六爲藝林傳誦

湖海詩傳

讀彭文勤公經進稿其中多屬對工整典重渾成者偶錄數則於後亦可為初學開拓心胸之助

天下有三重議禮制度考文聖人等百王夏造殷

因周監恭進 禮器圖式表 皇朝王者之治三十年而後

仁天子所都五百里曰甸服天津連珠 駕幸潞流為

池有淀蓋七十二阻灤為界其址自遼宋金同

畝田宅宅如解衣衣我推食食我樂樂利利以春

風風人夏雨雨人同春七日秋七夕七見來復

之心五重午九重陽重叶剛中之德御製 節序詩 恭跋

天子所至曰幸以德為車以樂為御以人情為田

大德之致永年如月之恆如日之升如南山之壽萬壽經

壇廟兜觥田峻幽籥之三曰無疆鳳翽吉人卷

阿之四曰純嘏萬福 集成讚跋是謂太平之世曰

雨而雨曰暘而暘則知小人之依先憂而憂後樂

而樂御製雨 雪陰晴詩 恭跋有象之春夏秋冬孰主張

是孰綱維是孰居推行是無形之陰晴雨雪我潤

澤之我滲漉之我汜布濩之同心惕若以乾乾

聖原無過言達之而豐豐民可使知恭謝 知過論 墨刻 摺子 恩賜

承筐肆宵雅之三食萃空愧受祿頌

天保之九戩穀馨宜恭謝 賜鹿肉 摺子 恩在治忽觀古人之

象繪作有虞先稼穡知小民之依

圖成無逸

恭謝

宋李迪雜雜待餉圖墨刻

恩賜

御臨 十二時不翼

而飛

天之所助者順千萬里如指諸掌

聖不可知謂神

恭謝

平定臺灣紀事文墨刻

恩賜

御製

維天爲

大有成功斯有文章維

聖成能有文事必有武備

上同

三皇各歲萬八千史臣勒

之古牒伊耆在位七十載虞典首於尙書

恭請編

萬壽八旬

盛典摺子

奉三無私

聖人之作也如覆載照致四必得

昊天其子之以保佑申請誦六章之詩川至日升月恆山

阜岡陵松柏之茂塵

敦九功之敘利用厚生正德水火金木土穀惟脩

上同 著

來

恩重憶舊服之鵲懸捧出心驚惕微衷於鵲翼

恭謝

恩賜

狐端罩

摺子 齒非加長實維逾格之施步本不工彌

切殊常之感

恭謝

禁城內騎馬

摺子 竊幸遊

門學疲羸之十駕願同在廐頌福祿於

萬年

上同

播晨綸於

西苑得爲氓而

仁許受塵曝冬日於南榮將改歲而

恩謀入室容身環堵憶跼江國之牛宮待漏觚稜不隔

禁城之魚鑰

恭謝居內城摺子

賜

夢為蝴蝶本在漆園

傲吏之書紀于太常宜入日下舊聞之錄

恭謝

恩

賜仙蝶詩墨刻摺子

御筆太常

君上補造物無不接之青黃

父母篤恩勤有必周之黔赤

恭謝西十二縣偏災摺子

恩撫江

不得

已而用師往有功无所利而為我戰則克

御製詩

文十全集進表

國家豐亨豫大再籌三十年之通民戶朝饗夕飧或

鮮萬千斯之積富非藏國利本因民矧當太倉之

陳陳相因何如高廩之多多益善

恭謝

旨普免漕糧摺恩

子輔相裁成而泰有福天施地生而益无方

平惠全書進表

通觀全稿益得力于宋四六為多

松軒隨筆

摘句包山具區濱直境入短幅山影七十二湖

光三萬六

六逢唐宋元明代疊衍來鼻仍耳人

恭和

御製命彭元瑞曹文植檢四庫全書古來見元孫者有幾據奏自唐迄明凡六人詩以誌事元韻

皆地行仙德既醉自

天子所福來

同千叟

陌上泥沾高下屐擔頭香過短長亭杏花

曹錫寶

字鴻書號檢亭江南上海人乾隆二十二年進士

官監察御史贈左副都御史

檢亭胸襟瀟灑早入

內廷隨巡侍直時有篇章流傳日下及登進士改庶

常復由部曹擢為侍御因見朝貴家人貪縱不法

劾之詢無實據吏議請革職

詔特原之仍令畱任及至嘉慶己未正月

上追念其慷慨敢言不愧諍臣之職且其事亦非失實追

贈副都御史并蔭其子為中書蓋異數也湖海詩傳

摘句 驚沙常暗日衰草自生風塞上

山自朔庭環九域城聯遼海控三邊

彭紹升

字允初號尺木江南長洲人乾隆二十二年進士

有觀河集

允初為芝亭先生第四子自雋南宮即辭廩仕古

文宗法震川詩亦克承家學湖海詩傳

先生學兼儒釋仁恤鄉梓所著文集諸傳志表微

闡幽可備史冊非泛作空言者比羣雅集
 尺木居士甲門華胄而淡於世情耽於禪味殆有
 夙根耶然其所著二林居集於近時名臣名儒循
 吏生平行實為之搜羅綴輯成一家言而於砥節
 礪行之徒濟人利物之事尤必懃懃焉紀載而表
 彰之此非特畱心文獻其於扶世翼教益有深衷
 焉余謂先生不愧儒者特以性地高明厭棄塵俗
 故不覺有契乎釋家之言耳嗟乎昔之人名為儒
 而實惑於釋者豈少也哉聽松廬文鈔
 蔣心餘題允初詩卷云季子席華盛刻苦如諸生

聞道一何早曾閱同經營其推重如此聽松廬詩話

摘句 有懷長傍佛無夢不依山

九死流離君父痛一生患難弟兄情二姜先生

雲淨寒潭纔見月雪消梅萼早生春

孫永清

字宏圖號春臺江南無錫人乾隆二十四年舉人
 官廣西巡撫有寶嚴堂詩鈔

君少而敏慧年二十二為諸生入廣東布政使胡
 君文伯幕值土司以爭廕襲相訐告驗之皆明時
 印璽總督將擬以私造符信比叛逆律當斬株連

者眾君先私具稿見胡君曰士會意在承襲無他志豈宜妄以叛逆坐之胡君曰是督撫意且限迫安能倉卒易稿君乃出所具示胡君胡君讀竟大

喜陳于督撫從之得活者二百餘人

春融堂集

安南諸大校莫黎鄭阮諸姓相吞噬久矣先是黎氏殘莫氏而據其國其臣鄭檢尋篡奪阮惠誅鄭并逐黎氏乾隆二十五年黎維祁啟關求內附時

高宗純皇帝已遣福公康安總督兩粵將議討君為廣西巡撫密陳曰黎阮相吞噬外夷之常聞安南深懼天威可以折箠使也福公然之阮惠果悔罪自陳乞効職

貢恭遇

高宗八旬萬壽入覲既至請用中國冠服

上益嘉之賜名光平禮成而還

同上

五十二年臺灣林爽文反調廣西兵合剿君往駐梧州擇勇銳者勞遣之士氣騰湧臺灣平福公謂是役也得廣西鎗兵之力為多

同上

標題 峽山寺和翁學使

古七

摘句 城依綠楊岍風遞白蓮香

積雨綠巖岫空林明翠微

秋聲暗挾江濤壯雲氣遙連海色多

黃紹統

字燕勳號翼堂廣東香山人乾隆二十四年舉人
官瓊州府教授有仰山堂集

燕勳前明祭酒佐七世孫八歲而孤家貧奉母甘
旨常充母卒臥靈帷三年不入內室己卯舉於鄉
選石城訓導進諸生以聖賢實踐之學在任十八
年擢瓊郡教授士民餞送二十餘里設供帳三百
餘所從來司鐸所未有也瓊有劣生被褫賄以千
金求復不許復挽上官關說變色以拒曰吾焉用
是不義貲遺子孫乎卒於瓊瓊人弔唁不絕香山縣志

馮編修敏昌至會城見其詩大傾倒遂訂古交上

翼堂訓導石城學者稱仰山先生嘗自署楹帖云

為倫類中所當行之事作天地間不可少之人其

子培芳以詩名畱心經術兼工書畫嶺南羣雅

先生闢仰山堂進士人課之如課子弟邑之老者

敦禮之窮而無告者周恤之節孝者白於上而旌

之故邑人雖野夫孺子皆敬先生如父師聽松廬文鈔

標題 十八灘五古 五人墓五古

摘句 柴門迎晚照籬落隔平蕪

才人奢名不奢福饜飫六籍天亦妬

寧甘憂憤名詩史不願疎狂學酒徒杜工部

虔禮寶

字席珍一字律齋號古愚漢軍人乾隆二十四年
舉人官兵部侍郎有椿蔭堂稿

公本姓楊初任高平縣知縣嘗自題容我山房云
退思只願身無過守分方知樂有餘釀酒先栽三
徑菊看山更擁一牀書可想見其為人聽松廬詩話

摘句 鴉背晨光明遠近馬頭寒色認迷離

百種飄零天不管青山啼遍杜鵑聲落花
水天無事容高臥此意蕭然便十洲

畢沅

字緝蘅號秋帆江南鎮洋人乾隆二十五年

賜進士第一人官湖廣總督贈太子太保有靈巖山人集

關中勝蹟圖誌陝西巡撫畢沅所進其書以郡縣
為經以地理名山大川古蹟四子目為緯而以諸

圖附於後援據考證各附本條具有始末四庫提要

公少孤資性穎悟十五歲能詩從沈宗伯德潛惠

徵君棟游學業益邃乾隆十八年順天鄉試中式

又二年補內閣中書直軍機處二十五年進士及

第授翰林院修撰三十一年授甘肅鞏秦階道三

十二年授陝西按察使司十月擢陝西布政使十
二月護巡撫印務時征大小金川京營及各省之
兵先後入蜀取道潼關公調運糧餉撥解軍器安
設臺站源源協應三十八年河洛渭三水並漲分
別賑恤全活甚衆授陝西巡撫三十九年勘西安
八旗人馬厰空地在興平蓋屋扶風武功四縣者
四百八十餘頃悉募民開墾歲納租賦爲八旗賞
卹之需重修華嶽廟暨漢唐以來名蹟又秦中碑
版最多萃而置之府學俾毋散佚元聖周公墓在
畢咸陽縣北畢原有姬姓奉祀生一人援曲阜東野

氏之例置經博士一員請世襲并奉文武成康四
王陵祀報可是年十二月丁張太夫人憂回籍明
年十月陝西巡撫員缺奉

旨畢沅前在西安最久熟悉情形且守制將屆一年着前
往署理四十六年甘肅河州番回相仇殺傷及蘭
州知府副將聞警卽屬提督馬彪西安將軍伍彌
泰等統滿漢兵往擊討之繼聞陷河州逼蘭州府
城又檄延綏興安二鎮一由固原平涼一由略陽
鞏秦分道並入適

上命大學士章佳文成公督剿蹙之化林坪賊遂平四十

九年甘肅平涼番回復亂公先調滿漢兵赴剿
上仍命文成公偕富察文襄公領健銳火器兩營兵進剿
番回窮蹙乞命械赴京師先是西安省城日久頽
圯公請帑興修三年工畢五十年調河南巡撫豫
省水旱公請截漕二十萬石平市價以濟民食五
十三年夏秋多雨漢江及洞庭諸水驟漲出江以
截江流故江水亦騰踴決荊州堤潰城而入奉
旨授湖廣總督兼署湖北巡撫發銀一百萬兩爲工賑之
用八月抵荊州同文成公勘潰決緣由蓋因江自
松滋而下至荊州萬成堤折而東北北流本窄又

有害金洲沙長數里以障其南兼之盛漲無所宣
洩直注堤根潰決實由於此乃盡剷洲芻蘆葦於
對岍楊林洲斜築土壩並築雞嘴石壩逼溜南趨
以刷洲沙無致壅遏而北於是城堤皆足保護矣
五十九年八月陝西之安康四川之大寧郭教起
皆稱傳教由湖北公馳赴襄鄖訊辦有
旨降補山東巡撫六十年五月仍授湖廣總督卽赴新任
二月初襄城聞貴州銅仁苗民石柳鄧湖南永綏
苗民石三保等四出鈔掠馳赴常德奉
旨令駐荊常適中之地爲後路應援是時乾州鳳凰廳諸

國朝詩人傳卷三十七
處盡爲賊藪且圍永綏雲貴及湖廣官兵分駐鎮
軍轉餉甚急公令長沙岳陽常德澧州荆門州各
屬先儘常社兩倉存穀刻期碾運由辰州轉解軍
營且令雇船從朗江以達五溪較用夫背負爲便
而辰谿岨門砦以上多苗寨派文武能事者駐兵
防護運道始爲周密熟苗有被脅者准其自首示
以若先效順候事平分給逆苗田產又賞給銀布
米糧以散其黨繼聞永綏圍解卽在花園隆團一
路安設臺站六省之師每日供支數萬迅速周詳
上聞而益嘉之自三月至八月乾州苗民五百餘寨先後

詣辰乞降公便坐傳見不設兵衛導以

朝廷威德勉令自新羣苗涕泣叩頭去嘉慶元年湖
北賊起詭稱白蓮教宜都長陽各聚數千人爲應
公赴枝江調兵搜剿連破蕭家巖栗子山各寨擒
斬千餘賊竄山北而宜昌別有賊數千分擾遠安
東湖當陽復調河南南陽陝西興漢二鎮兵往援
未至當陽陷隨統官兵募鄉勇與前護軍統領舒
亮進圍之殲其外援三千人斬僞帥楊啟元等七
月破城因奏當陽善後六事一編審民戶二分撥
營兵三裁撤鄉勇四賑卹良民五旌獎忠節六修

建城垣其他儲備徵發供支策應遠近紆籌鬚鬢
為之頓白奉

旨畢沅前此剿洗當陽肅清縣治著有勞績不可不加懋
賞着賞給輕車都尉世職公復密奏逆苗石三保
等就擒石柳鄧旦晚可獲以十萬之眾駐守環攻
苗人生計無資賊首反得從中煽誘不若乘其窮
蹙予以自新且就降苗內擇其趨捷者以苗攻苗
不至再煩兵力撤出官兵併剿襄鄖宜昌諸賊自
可即日掃除

上下其章於軍中皆以為宜十二月官兵破平隴斬石柳

鄧復擒吳廷義等於是將軍明亮酌撤官兵前赴
達州宜昌軍聲大振明年公遵

旨留駐辰州綜攬南北諸軍事羽檄紛沓心規手畫炎天

瘴毒積勞成疾七月初三日卒於官舍年六十有

八

春融
堂集

公著續資治通鑑二百二十卷別為攷異附於本

條之下凡四易稿而成

潛研
堂集

秋帆制府愛才下士又好刻書惠定宇徵君所著
經說悉為剗剗生平有幹濟材在陝重建省城又
修華陰太白祠及涇渠在豫開賈魯河修桐柏淮

源廟

湖海詩傳

標題

華嶽聯句一百韻

古五

昭陵石馬聯句

古五

開成石經聯句八十韻

五言排律

摘句

竹深僧貌寒月暗佛燈耿山空木葉下秋

與鐘魚永

夜市有人沽玉盃秋風無淚泣銅仙

咸陽懷古

平淮功定資裴相檄蜀文還仗馬卿

寄趙損之

王文治

字禹卿號夢樓江南丹徒人乾隆二十五年

賜進士第三人官臨安府知府有夢樓詩集

君成進士授編修為壬午科順天鄉試同考官癸

未科會試同考官其年

御試翰林第一擢侍讀署日講官旋

命為雲南臨安府知府數年以屬吏事鐫級去任其後當

復職而君厭吏事不復就官

高宗南巡至錢塘僧寺見君書碑大賞愛之內廷臣有告

君招君出者君亦不應君之歸也買僮教之度曲

行無遠近必以歌伶一部自隨其辨論音樂窮極

幽渺海內求君書者歲有餽遺率費於聲伎然客

去樂散默然禪定持佛戒數十年君嘗自言吾詩

字皆禪理也嘉慶七年四月二十六日跌坐室中
 逝矣年七十三妻女子孫來訣不為動容問身後
 事不答然則君殆莊生所謂遊方之外者耶文藝
 雖工特君寄迹況於伎樂遊戲之事乎惜抱軒文集
 禹卿賦才英俊尤工書法全侍講魁周編修煌奉
 使琉球挾以俱往故其詩一變頗以雄偉見稱其
 時袁子才壯年引退以詩鳴江浙間禹卿繼其後
 聲華相上下湖海詩傳
 夢樓太守風流倣儻書如其人詩亦無愧作者究
 其才力自遜蔣袁而李雨村盛推之此門弟子之

私言非公論也惟隨園贈夢樓詩有云才子中年
 多學道仙人家法愛吹笙頗切其人聽松廬詩話

標題 登萬壽閣望華山古五

摘句 水涵星不動帆正月同懸

山密天無縫第過石有聲黔中

將離更唱紅蘭曲相憶應看青李書

烟光自潤非關雨水藻俱馨不獨花

五字河梁蘇屬國經年書記阮陳畱

軍政纔聞誅後至將星忽報落前營

玉牒銀潢九天上高牙畫戟大江東

吳璜

字芳甸號鑑南浙江山陰人乾隆二十五年進士官戶部主事候補四川直隸州殉難贈巡道有黃

琢山房詩鈔

癸巳三月揀發四川五月十七日詣登春軍營大將軍某素矢將士心六月初十之夕木果木軍潰大將軍死登春一軍亦瓦解公為礮石飛擊人馬墜溪河中同墜者四千餘人時年四十七事

聞得贈加道銜入祀昭忠祠

忠雅堂文集

陸燿日鑑南為樸庭先生

論文

令子商寶意太守

之甥舉京兆出蘭泉王舍人之門

兩浙輜軒錄

摘句

河流抱伊闕嶽影護秦關

碧雲影斷人何處黃葉聲寒雨忽來

漫攜謝朓驚人句要和張華勵志詩

伏櫪還存千里志安巢偶借一枝棲

短蘆一帶低如屋空翠千層遠入城

陶然亭

謝啟昆

字蘊山號蘇潭江西南康人乾隆一十五年進士官廣西巡撫有樹經堂詩集

公授編修出為鎮江知府又知揚州府寧國府擢

河庫道浙江按察使山西布政使調浙江布政使
今上親政命爲廣西巡撫凡三載嘉慶七年六月乙丑終
於位年六十六至廣西築湘灘之隄民呼曰謝公
隄爲藩司持身廉潔無造怨于吏民而能完久虧
之額又興學校飾營伍文武皆懷愛之所著樹經
堂集西魏書小學攷廣西通志若干卷惜抱軒文集
公爲乾隆庚寅河南鄉試正考官辛卯會試同考
官多得賢才其最者會稽陳大文歷城方昂以吏
績名曲阜孔廣森以文學顯生平重交遊獎氣類
居廣西作懷人詩數十篇首其座師大興翁學士

方綱次桐城姚鼐也同

蘊山爲覃溪少卿入室弟子篤信師說畱心著撰

至桂林作粵西金石志與覃溪粵東金石志並行

又修廣西通志微顯闡幽搜羅博洽爲詩不名一

家而詳于詠吏湖海詩傳

標題 台州勘災紀事七

摘句 南斗一星扶北極西江隻手障東川王文成像

陳奉茲

字時若號東浦江西德化人乾隆二十五年進士

官江蘇布政使有敦拙堂集

公成進士授四川知縣當金川為逆大將率兵討之任公主礮局及修飭兵興橋路常居口外山谷間瀕危勞績甚著有三雜土司地當進攻金川之路官兵猝至三雜長卓爾碼婦人也謂且伐之閉道不通將校譁言三雜畔矣宜先攻公告將軍三雜未知國家意耳非畔也請往察而諭之將軍從公策公至一告諭卓爾碼即散守者具狀上謝且奉軍過甚謹其後

詔加其封曰賢順卓爾碼以謂惟陳公活我又予我以榮

也惜抱軒文集

公在蜀凡二十七年其後居江南九年熟習民情能以簡靖漸祛其患吏民愛戴謂得大臣之體好士樂善獎掖如不及同上

作詩專法杜子美論者謂朴厚之氣殆足媿之同上

標題 別老母之官茂州五古 出塞五古 梵詛五古

清溪縣境七古 寶雞五古

摘句 論詩到針芥世情百不顧

清茶故山味小吏閒鷗姿

慮澹身易閒趣深物無劣

日生底柱關門赤風捲中條嶽色黃

四山秋雪明紅樹一驛寒雲瀉碧泉

閒街遶水僧門綠小巷通風藥店香

殘編熟盡還相對蠻語通多總入詩

天垂地底根皆見石上雲端骨欲飛

傳浪鼓山

老冰如石塞陰洞積雪捲風埋壯夫

安得從容共文酒細商此事付將來

吳泰來

字企晉號竹嶼江南長洲人乾隆二十五年進士

官內閣中書有淨名軒集

企晉襟期清曠意致蕭閒少中副車選校官以松

滋山水之佳勾留竟歲旋以病歸其大父吉安大

守銓歸築遂初園於木瀆雲林杳靄花葯參差有

柳堤鶯囀竹溪烟雨爽臺秋月莎邨觀刈松閣聽

濤巖東霽雪諸勝其尊人用儀復購書數萬卷於

其中多宋元善本遂與江浙諸名士流連觴詠如

是十餘年後成進士

召試賜中書而少無宦情壯而彌甚既而兄弟析產出藏

書而貨之并售其園於是同年畢公沅招主關中

書院攜家而往後又隨至開封年六十餘而卒企

晉才情明秀作詩大指一本漁洋子與訂交將及

四紀向所同遊者零落殆盡金谷玉山之雅集不

可復得今取其詩吟諷之不啻山陽之笛矣湖海詩傳

標題 十八盤五古 湖樓曉起五古 吳越王廟七古

重修瀟橋紀事聯句七言排律

摘句 禪心水上月世事風中帆

殘陽明浦樹新月上漁家

自古邊庭須魏尚至今父老怨唐蒙讀史有感

戰壘新堆巴子戍降王舊拜夜郎侯

好尋摩詰還山詠未過羲之誓墓年

錦袍烏帽成千古明月清風又一時牛渚

王宸

字子凝號蓬心江南太倉人乾隆二十五年舉人

官永州府知府有蓬心詩鈔

蓬心麓臺侍郎曾孫所繪山水頗能入室美鬚髯

工飲酒著有繪林伐材十卷上自黃帝下逮

國朝乾隆時人亦畫史之總龜也湖海詩傳

太守罷官後以詩酒陶情人呼曰老蓬仙嘗慕柳

下季東方曼倩之為人號柳東居士南野堂筆記

摘句 苦吟咽秋菴旅夢冷秋雨

寫幅丹青閑換酒每逢佳客便當留

申兆定

字圖南號鐵蟾山西陽曲人乾隆二十五年舉人
官定邊知縣

圖南清羸多病歷官均以廉聲著中年學道又工
八分書所撰涵真閣漢碑文字如郝閣頌張壽景
君諸碑跋皆精深詳密作令十年遽歸奄忽其夢
入西溪偶賦云云殆詩識耶湖海詩傳
摘句 如何花底客竟是夢中身夢入西溪偶賦

國朝詩人徵略卷三十七

國朝詩人徵略卷三十八

番禺張維屏子樹輯

王杰

字偉人號惺園一號畏堂陝西韓城人乾隆二十
六年

賜進士第一人官至大學士贈太子太師諡文端有葆淳
閣集

公以拔貢生得教諭未任遭父喪服終貧甚為書
記以養母所居幕府尹文端公陳文恭公為江南
督府時也兩公皆賢公謂為正士惜抱軒集

乾隆五十一年拜東閣大學士公為人廉靜質直
誠於奉職其居位與和珅同列公以大體接之不
為壯頰悻悻之事而遇所當執終不與和珅附公
素行無疵瑕

純皇帝知公深和珅雖厭公亦不能去也公之心人不能
具識而至其入陳

禁陞裨益朝廷者又非人所得聞故不可得而述上同
嘉慶七年公以老病乞休

御製詩送之有云直道一身立廊廟清風兩袖返韓城足
以盡公生平矣上同

公為乾隆庚戌科會試總裁官又嘗為湖南江西
浙江考官一督福建學政三督浙江學政所進多

佳士上同

公嘗訓及門云為政之道當開誠布公不可有意
除弊此弊除他弊興矣性寬厚然於世之以姑息
為寬大者極不然之曰縱惡以取名如

國家何生平於浮屠老子法未嘗言及亦不排斥有
道及者輒不對曰吾未嘗習此也王文端公年譜

公著有惺園易說解共九三爻辭云若濡有愠言
已若為所濡不能無愠究之事過而心跡自明所

謂其要无咎也公此言殆自白其衷懷耶聽松廬文鈔

摘句 鳶魚知道趣鷗鷺澹詩心

記否刺船巫峽日青簾白舫杜陵詩

趙翼

字雲松號甌北江南陽湖人乾隆二十六年

賜進士第三人官貴西道有甌北集

雲松性情倜儻才調縱橫而機警過人所遇名公卿無不折節下之初受知於汪文端及入中書直軍機處傳文忠尤愛其才旋以及第改翰林數年簡放知府出守廣西鎮遠時緬甸用兵

詔選鄰省幹才助蒐軍實君住永昌半載會文忠將督兵

采入遣之還粵又為李制府所賞調廣州并登薦

剡擢貴西道尋以母老不復出迄今幾三十年同

時與袁子才蔣心餘友善才名亦相等湖海詩傳

君官中書舍人入直樞要進

奏文字多出君手每扈從出塞戎帳中無几案君伏

地起草頃刻千百言不加點忠雅堂文集

先生撰廿二史劄記攷證精審持論明通又撰陔

餘叢考一書雖未及顧氏之日知錄錢氏之養新

錄然於文字事物之間或究其源流或正其譌誤

不特多聞之有助亦為解惑所取資又撰

皇朝武功紀盛一編以連篇累牘所未能備述者而簡括出之亦足徵史才也惟簷曝雜記體例稍雜然

國家掌故及滇黔各省土風物產皆略可藉以攷見

蓋凡先生所撰著均能使人增益見聞通知時事

較之斷斷考据於無用之地者似為勝之

聽松廬文鈔

甌北先生晚歲退閒取唐宋諸家全集再三展玩尋繹得識各家獨至之處故所撰甌北詩話挾摘精微指陳得失語多切當非僅見方隅橫生議論者可比也其論列詩家梅村之後獨舉初白蓋初

白之詩空靈變化有廣大教主之風先生詩與之相近故不覺為鍼芥之投然合觀全體漁洋之高秀竹垞之厚重初白亦有所未逮惟初白生當王朱並峙之時獨能陶冶性靈自成面目此所以為不可及而先生舍王朱而特舉之亦可云獨具隻

眼者矣

同上

甌北五古中論古論事論理諸作雖虛字太多發論太盡於古人渾厚含蓄一唱三歎之旨幾不復存然胸中有識腕底有力眉開目爽自成為有韻之文且其所言每如吾意中所欲出讀至愜心處

似倩麻姑癢處搔也聽松廬詩話

七古才氣奔騰時見剝滑五七律多工巧奇警之句然力求工巧可稱能品却非詩家第一義也上人參一兩直十金此康熙五十年後事也至乾隆十五年白金一兩六錢易參一錢二十八年價至三十二換嘉慶初年白金三百兩易參一兩今則價愈昂而佳者愈不可得誠如甌北人參詩所云但許活富人貧者莫可冀矣然貧者無力服參豈遂坐視其殆余嘗用黃耆黨參療極重之病多則一兩少或數錢連服數劑屢屢見效時醫遇重病

輒云非人參不治亦思世間病人力能服參者有

幾哉松軒隨筆

標題 讀史二十一首五古 第三首 第八首 第十首 十一首 二十首

偶得十一首五古 第一首 第四首 第五首 第八首 第十首 十一首

赴滇從軍作五古 連日無蔬菜至平夏

買得蘿蔔大喜過望而紀以詩五古 編詩

五古 放言五古 觀西洋樂器五古 青山莊

七古 行圍即景七古 贈相士彭鐵嘴

七古 南珍七古

摘句 人日住在天但知住在地天者積氣成離

地便是氣氣在斯天在豈有高下異
兒生母已乳蠶生桑已葉生之斯養之未
嘗有德色

眼白識王敦面青識盧杞一見定其人終
身弗改徒藉非有性惡何以驗若此後儒
強爲詮分別氣與理既名之曰性理早落
氣裏

硝磺製火藥世乃無利兵玻璃琢眼鏡世
乃有老明由來利用物亦隨時會呈當其
機未啟雖聖難預迎及夫爲用廣聖亦不

能更

乃知曠達言大抵十九寓一朝見可欲鮮
不失故步徒以言取人動爲古人誤

荆公變祖法欲創富強治及思法必行勢
須使指臂羣小遂競進流毒不可制始知
功名心亦足禍人世

天地有至文花鳥與山水亦必有解人乃
不虛此美可憐蚩蚩氓熟視不覩此其有
才智流又爲名利使倘無我輩在蕭閒味
其旨大塊亦寂寞歎世無知己

公卿視寒士卑卑不足算豈知漏一盡氣
燄隨烟散翻藉寒士力姓名見豪翰使其
早知此敢以勢位慢

同乎俗吏爲吾意旣不欲異乎俗吏爲吾
力又不足

曉星明似月古堠立疑人

千盤蛇陣勢十萬馬蹄聲

出古北口

倉皇臨大變智勇出良知

樟樹鎮

月華涼在水山影澹於雲

江雲殘夜黑海日五更紅

杜門閒客散攤卷古人來

天遠似連地月高偏傷人

九邊塵靜平安火上苑春催頃刻花

同輩半爲揚鱗客至親翻有向隅人

宜名

品題未便無雙士遇合先成得半功

薦條

欣賞情同青眼客別裁權亞黑頭公

藍筆

黑頭公謂主司用黑筆

落花退筆全無豔食葉春蠶尙有聲

落卷

未妨螺贏艱生子笑比琵琶別過船

撥房

十數名分新雁塔一家人聚小龍門

房卷

匡卓言人復田卷三十八
一軍皆甲晨聽令萬馬無聲夜踏邊
久客不歸無異死故人入夢尚如生
家貧婦或勞兼婢身老兒還小似孫
潮定未分消長水風橫兼使往來帆
絕頂樓臺人倦後滿堂袍笏戲闌時
無官豈必皆高士有福何須作貴人
焦頭救已愁災熾生齒繁應有劫來
一蚊便攪人終夕宵小原來不在多
到老始知非力取三分人事七分天
千秋自有無窮眼豈用爭名在一時

李文藻

字素伯號南澗山東益都人乾隆二十六年進士
官桂林府同知有恩平潮陽桂林諸集
南澗成進士謁選得廣東恩平縣知縣後調潮陽
縣以海疆三年俸滿保薦擢廣西桂林府同知未
及一年而沒其居官以清白強幹稱嶺南俗多竊
牛牛皮色相似雖獲盜多不承有司無如之何南
澗始至令有牛之家各於牛角印烙私記凡赴墟
賣牛者牙僧以印烙登簿以印付買主如告失牛
先以印呈官官遣役持印驗墟簿無得隱者大府

善其法下所部行之潮陽民好械鬪往往殺傷多人南澗至則懸鉦於堂上有將鬪者令地保馳入城擊鉦立往拘治衆則散矣潮陽海陽揭陽俗稱三陽仕其地者多致富南澗去官之日囊橐蕭然還至番禺命工摹光孝寺貫休畫羅漢四軸以歸曰此吾廣南宦橐也性好聚書每人肆見異書輒典衣取債致之又從友朋借鈔藏弄數萬卷皆手自讐校於金石搜羅尤富所過學宮寺觀巖洞崖壁必停驂周覽有僕劉福者善椎拓攜紙墨以從有所得則盡搨之嘗乘舟出迎總督小憩南海廟

命僕拓碑秉燭竟夜比曉問總督舟已過矣其詩古文皆自攄所見不傷前人門戶然口不道前輩之短以爲非盛德事元和惠定字婺源江慎脩皆素未相識訪其遺書刊行之子嘗戲論南澗有二反長身多髯赴赴如千夫長而胸有萬卷書一也生長於北海官於南海二也湛思著書欲以文學顯而世稱其政事三也潛研堂文集
在嶺表士子以文就質無虛日獨稱欽州馮敏昌順德胡亦常張錦芳作嶺南三子歌同上
素伯窮經志古肆力於漢唐註疏陞州牧引

見來京聞余有惠氏易漢學諸書至余寓舍借鈔大暑中
漫膚多汗沾漬衣襟不以爲苦也嘗約其友周編
修書倉取經史著述未甚傳于世者刻爲貸園叢
書而素伯歿其後遂不能續今所傳者止十二種
而已湖海詩傳

南澗先生嶺南三子詩蓋作在先其後與黃虛舟

黎二樵呂石颿交善而於二樵尤爲傾倒又有張

黃黎呂之目聽松廬詩話

標題 觀音巖五古

摘句 俸薄儉常足官卑清白尊

山色暮愁裏雨聲寒食前

涼生獨客枕聲入萬家心聞雨喜作

十三都內皆安業一百餘年不被兵

曹仁虎

字來殷號習庵江南嘉定人乾隆二十六年進士

官侍講學士有宛委山房諸集

君在禁林每遇大禮高文典冊多出其手館閣代

言之文院長輒委屬艸皆典重清切宜古宜今擢

右春坊右中允扈

蹕盤山有奉

敕賡和諸作累擢侍講學士五十一年奉

命視學廣東與平少詹恕交代少詹為諸生時嘗受業於

君粵人傳為美談明年程太恭人終於官署君方

按試連州聞訃晝夜號泣甫匝月竟以毀卒春秋

五十有七

潛研堂文集

君詩宗三唐而神明變化一洗粗率佻巧之陋少

時與王吳趙諸君唱酬彙刻其詩流傳海舶日本

國相以餅金購之其事二親孝所得俸錢分寄諸

弟無私藏焉所著詩有春槃瑤華倡和秦中雜稿

轅韶鳴春諸集又有蓉鏡堂文稿二十四氣七十

二候攷轉注古音攷同上

來殷以聲華名望為都下所推然端靜自守不至

朝貴薰灼之門時詩道雜而多端或做白居易或

做黃庭堅楊萬里或至做袁宏道信手塗抹率以

流易佻巧為能如郭舍人之俳諧鄭五之歇後黃

茅白葦彌望皆是及來殷詩出乃奏金石以破蟋

蟀之鳴

湖海詩傳

標題 秋晚田家雜興五古 馬伏波銅鼓歌七古

辟雍釋奠講學禮成恭紀五言排律一百二十韻

東巡上 陵禮成恭紀百韻五言排律

摘句

林光微露日石氣欲生雲

綠樹歇疎雨人家春鳥鳴斷雲諸寺出斜

日半山明

紫霧千盤開漢碣碧霞四氣拱秦封

西京專闔推橫海東漢登壇數伏波

初添蜀郡三城戍更遣秦川四道兵

校尉盡看紅帙首材官齊號黑雲都

奸細幾曾誅趙信征人空見老班超

執法烏臺秦御史談經絳帳漢儒林

梨花小院重重樹燕子高樓面面風

白蘋千點鷺初散紅雨一簾鶯亂啼

聽雨聲從殘夢覺惜花情比憶家深

記得小窗相伴讀晚涼庭院水晶簾

陸錫熊

字健男號耳山江南上海人乾隆二十六年進士

官副都御史有篁邨詩集

耳山博聞彊記資稟絕人二十七年

召試

賜內閣中書人直軍機初與子奉

敕編通鑑輯覽頌之

命輯永樂大典復求天下遺書開

四庫館以薈萃之校對數百人謄錄至千餘人歷十年始成而君與今大宗伯紀君曉嵐司其總每進一書仿劉向曾鞏例作提要冠諸簡首

上閱而輒善之

特旨由刑部郎中授翰林侍講文字受

知駸駸嚮用典試者二督學政者一後因奉天所儲

四庫館書中多脫落舛誤奏請自往覆校比至而病

歿時論無不痛惜平日進

御之作工而不穠婉而能切同人推為莫及至詩文隨手

散佚歿後搜篋中得數百首皆應酬之作非其稱

意者湖海詩傳

標題 戲鴻堂石刻歌什 鉛山追悼蔣心餘古五

摘句 山青削兩崖天白露一綫眾壑競奔流斜

曳萬丈練橫塞灘

田俯僧衣碧峰交佛髻青

小牀怯雨畱燈坐薄絮欺寒壓夢眠

手摘明星望鄉國黃河如綫走中原

吳玉綸

號香亭河南固始人乾隆二十六年進士官兵部

侍郎有香亭詩集

君成進士改庶吉士散館授檢討充

武英殿纂修乾隆三十年充順天鄉試同考官三十

三年遷貴州道監察御史十月遷太常寺卿三十

九年充順天鄉試同考官四十一年

上以金川平將告成功於

闕里

特命君先往演習禮樂四十四年又以熱河

文廟成

上將親往釋奠亦先遣往習儀四十五年正月扈

蹕南巡四月陞都察院左副都御史四十六年充會試副

總裁得錢棨等一百六十八人四十八年六月充

浙江正考官是年九月授福建學政五十二年還

京二月授兵部右侍郎五十四年以事降檢討君

既復歸館職悉心纂校凡七年而年已六十有四

詔以原官休致既歸俯仰邱園教子孫以孝弟讀書一如

中丞公之所以教君者

春融堂集

京師琉璃廠北巷古海王村也向為王漁洋司寇故

宅手植紫藤一株舊本久枯乾隆己丑香亭先生

寓此次年抽蔓復花因繪古藤詩思圖自為記一

時名流題詠殆徧錢文端有臭味尊前輩風流此一燈因君追往事其奈髮鬢髻之句蓋文端少時會過漁洋此寓云圖中佳句不可勝舉而余最愛錢穉石侍郎畫人只畫衲衣寒畫花并畫雕欄曲二語能寫出紫藤風致聽松廬詩話

余與公子嵩少水部

俊民

紅生中翰

葆晉

為文字

交垂二十年嵩少昆季寓橫街大川淀余每入都暇輒過從樽酒論文清歡永日古書繞榻綠陰壓檐渾忘身在軟紅塵土中也一日邀余小飲又出引藤書屋圖觀之引藤書屋者先生移寓橫街分

古藤而引其蔓以為新藤也此圖題詠不減前圖余最愛曹習庵學士人如五老當筵集花有雙身隔巷移之句又劉石菴相國句云消得一庭人影月紫英飄落酒盃中相國詩罕見此清麗者同上近人詠梅花多著相即如趙甌北單身立雪程門弟素面朝天虢國姨幾墮惡道香亭先生句云梅花清極本無詩七字為梅花掃多少荆棘同上摘句 千山關函谷一綫入秦州

白帝降精凝華嶽黃河倒影射潼關

四山落葉亂飛鳥萬樹遠松明夕霞

香過木犀能悟否廣寒高處本無花 詠桂

馮應榴

字星實浙江桐鄉人乾隆二十六年進士官鴻臚寺卿

星實英敏豁達有幹濟才既以江西布政使罷歸益肆力於典籍尊人養吾侍御注李玉溪詩最為精贍君師其意以蘇文忠公詩注疏舛尚多遂取王梅溪施輔之查初白諸本合抄之以攷其是非得失所採正史而外凡叢書脞說可證據者靡不

蒐討 湖海詩傳

星實先生沈酣於東坡詩者有年又得宋槧五家注元槧百家注舊本參以施注殘本稽其同異而辨證之竊謂王本長於徵引故實施本長於臧否人倫查本詳於攷證地里先生則彙三家之長而於古典之沿譌者正之唱酬之失攷者補之輿圖之名同實異者覈之以及友朋商榷之言亦必標舉姓氏其虛懷集益又如此合注出而讀蘇詩者可以得所折衷矣 潛研堂文集

摘句 列戟門疑水焚香事告天自然翔鸞驚詎待效鷹鷂 哭陸朗夫中丞

七盤路入星河影一綫江分隴蜀天

儲祕書

字玉函江南宜興人乾隆二十六年進士官黃州

知府有緘石齋詩稿

玉函好游後中甲科數載省郎一麾出守尋罷官

歸卒其詩淺而實腴清而不激又工倚聲湖海詩傳

玉函為理質太史在文之孫松軒隨筆

摘句 亂鴉盤古塔凍鵲聚閑門

海月迎人滿山花背客妍

衣袖尚存慈母綫盤飧重剪故園蔬

綠蔭村邊孤寺掩春陰牆角一花明

趙文哲

字升之號璞函江南上海人乾隆二十七年

召試

賜舉人官內閣中書殉金川難

郵贈光祿寺少卿有姸雅堂姬隅等集

乾隆壬午春

上幸江南進詩試

賜舉人授內閣中書舍人甲申直軍機房戊子秋侍講學

士紀昀中書舍人徐步雲洩兩淮鹽運使盧見曾

事君與余牽連得罪會兵部尙書阿公桂以定邊
右副將軍總督雲貴請以余兩人掌書記

詔許之明年三月至騰越州時大學士忠勇傅公恆奉

命經略緬甸七月偕協辦大學士副將軍果毅阿公里袞

由南大金江以西進討君出萬仞關緬地惡

多瘴攻壘久未克君乃以病還騰越州十一月緬

降撤兵傅公還

朝君始與余依阿公幕府居二年辛卯五月

上以理藩院尙書溫公福代阿公會金川土舍索諾木襲

革布什咱土司戕之喉小金川土舍僧格桑攻鄂

克什勢張甚總督弗能制九月

命溫公偕阿公赴蜀討之奏以余與君行十月至成都復

以君爲中書舍人明年壬辰五月余從阿公由章

谷攻達烏君畱溫公所是冬克美諾小金川平晉

君戶部主事又從溫公由空喀進討金川明年癸

巳兵至木果木攻五閱月弗克六月小金川降者

叛與金川合鈔後路初十日師潰賊邀於險溫公

歿君與其難時年四十有九按故事無驗而死于

兵名曰未出未出不得卹兵部員外郎巴君尼琿

以君陣亡報事聞兵部乃議贈光祿寺少卿子祭

葬工部作主躋于昭忠祠命翰林院立傳蔭子一

入國子監讀書期滿以知縣用春融堂集

標題 鄭學齋詩五 牟珠洞五 大池灘五

樂戶行七 猛拱土司進四象詩七 斑

爛山紀事七

摘句 一峰十萬樹一樹四五猿一猿千百聲雜

以風雨喧一日十二時一程三十里一軍

六千人盡在猿聲裏

山迴露碓牀岫迴隱漁鼓微風來炊烟人

家渺何所

石立水亦立飛浪搏人面

林霏寒作雨池水靜生雲

尚憶牽衣同拜母真從戴笠早稱兄

更無人影惟簾影纔和香煙又藥煙茶煙

朱孝純

字子穎號海愚漢軍人乾隆二十七年舉人官兩

淮鹽運使有海愚詩鈔

子穎奇男子也浩浩焉有擔荷一世之心劉海峰文集

子穎為都統龍翰之子承其家學能畫尤長于孤

松怪石鬚髯不多有兩莖綠脣而下長二尺許風

吹飄然撚之頗自憇也作令四川獨游峩眉經句
乃返後以迴避當量移他省時大兵方討金川子
穎單騎赴營觀戰鬥久之而去其募僕奇偉如此
愛友朋晚爲揚州鹽運使方欲招致大江南北諸
賢爲文酒之會而遽以風痺解職姚姬傳謂其不
可一世之氣勃然動于紙上王夢樓謂其豪宕感
激之意屢見於詩者信也湖海詩傳

孝純工山水知泰安府時曾作泰岱全圖墨香居畫識
朱子穎詩伉壯雄豪有幽燕老將氣槩聽松廬詩話

標題 對酒二首五古 登日觀峰觀日出七古 成

都逢楊竹堂七古 仲松嵐席上作七古

摘句 偶於會心時微言得要妙

只愁天上月併作鬢邊霜

鄉心垂萬里天影接諸蠻

一水漲喧人語外萬山青到馬蹄前

颿共龍鬣爭晚浪人如鳧雁在晴空

雞啼荒雪陳倉道馬亂春雲大散關

邊風壓地黃雲動朔氣橫關白日陰

椎牛穹帳三更雪飲馬長城十月冰

黃河一綫從天下太華三峰拔地開

四郡開邊虛鐵馬九天擊露失銅人通天臺
飛鳥與人爭道路啼猿知我憶家鄉

張熙純

字築時號少華江南上海人乾隆二十七年舉人
官內閣中書有華海堂集

築時英姿壯氣與升之同學齊名中年歿於京邸
未歷江山兵燹之奇故所作稍遜一籌湖海詩傳

摘句 人家藏遠樹漁火入寒流

洗鉢承花雨翻經和海潮

山店桃花分馬色溪橋楊葉試弓聲

連江暮雨孤帆卸萬樹秋聲一雁飛
詩就涪翁分一瓣酒同坡老鬪三蕉
紅牙曲罷千花暝青翰舟迴一水香

張九鉞


字度西號紫峴湖南湘潭人乾隆二十七年舉人
官南昌知縣

紫峴初宰峽江繼調南昌遇水災力請普賑水際
積骸纍纍捐廉購棺瘞之豫章溝渠淤塞力請開
通於是二十里長渠復其舊二湖積潦得以疏通

居民德之聽松廬文鈔

國朝詩人徵略卷三十八
贈耿湘門

摘句 不圖將別日得見未交人
歸程先鴈急老淚與潮平
遠地也須圖再會神交原不作初逢
海上碧雲今夕夢山中明月故人盃



國朝詩人徵略卷三十八

天保甲午

